



Aqqalu C. Jerimiassen

UKA 2022/80

Atassut

20. oktober 2022

Ilinniartitsisunngorlaat meeqqanut inuusuttunullu tarnikkut ajornartorsiutilinnut pitsaanerusumik sullissisinnaanngornissaat anguniarlugu ilinniartitsisunngorniarnermi tarnip pissusaa pillugu ikiuigasuarsinnaaneq aammalu meeqqat tarnikkut nappaatigisartagaat pillugit ilisimatusarneq eqqunneqarnissaat anguniarlugu Naalakkersuisut sulissuteqassallutik peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut Ilaasortaq Anna Wangenheim, Demokraatit)

Meerartagut siunissaraagut, ukiorpanni tamanna qinikkanit oqaaseq atorneqartaqaaq.

Maannalu siunnersuummi uani ilaatigut oqaatsip tamassuma timitaleriartuaarneqarsinnaaneranut aqutissanut ilaalluartoq Atassummiit maluginiarparput.

Meeqqat aturfiani atuartuungallarnitsinni ullaat tamaasa qilanaarissallugu takusassatta ilagisannguatsiarpaat ”vikarskema” nivinngarneqarnissaa, qanorlu ilinikkut freeriatarsinnaanitta periataarnissaa neriutitigerrattanguatsiarlutigu.

Meeraanermi soorunami eqqarsaatigineqangaaneq ajorpoq, sooq ilinniartitsisorisaaq sulinngitsoornerisooq, sunalu tamassumani peqqutaasarnersooq. Immaqami aamma 1990-ikkut aallartisimalernerani atuartuusugut, taamanilu ilinniartitsisusut uippakajaarnermik eqqungaaneq sunaasinnaanersooq imatorsuaq eqqarsaatigineqangaartanngilaq.

Qujanarli ullumikkut pissutsit allat atuummata.

Atassummiit assortorsinnaanngilarput, aturfik tassaasariaqartoq atuariartorfigissallugu nuannersooq, atorfigissallugulu toqqissisimanartoq.

Ilinniartitsisutullu ilinniagaqarnerup suli ullumikkumut naleqqussaqqittariaqarnera Atassummiit isuma pitsaasuutipparput. Tarnip pissusaa pillugu ikiuingasuarsinnaaneq ullutsinni pisariaqartinneqartutut inissisimalersimappat, mattukkusunngearput suleriaqqinnissami tapersiissalluta.

Meerartattami siunissatsitut taasarnerini, meeqqat aturfiani arlaatigut nanertisimanermik, meeqqaluunniit nappaataannik suussusersisaqarneqartariaqartunik allamilluunniit peqquteqartumik ikiortariaappata takuneqarsinnaasariaqarnera assortoruminaappoq.

Taamaattumik siunnersuut Atassummiit tapersernartillugu ilusaatut isikkoqartillugu taperserparput.